

## Le astuzie degli Scolari.

## CANZONE XXI.

**M**i veui un poch pr rie  
 Buteme a trastulè  
 Contand le furbarie,  
 E ruse dij scolè;  
 A l'an bin poch giudissi  
 Prchè ch' a son giovnot,  
 Ma peui parland dij vissi,  
 A son pro d' bon volpot.  
 Tratandse d' andè a scola,  
 Parland an general,  
 Cousta marmaja drola  
 Sovens a l'ha quaich mal:  
 Ma quand a l'è vacansa,  
 Lasseje fè i corè,  
 Anlora 'l mal d' pansa  
 J' ampacia pa a dmore.  
**S'**a venno a fè quaich fala.  
 L'astussia l'è an camin  
 Pr fè drochè la bala  
 Ados a quaich vsin;  
 S' angigno con dritura  
 Curvi i seu mancament,  
 E deje la tornura  
 Pr comparì inocent.  
**L'**an d' vote poca veuja  
 D' fè la composission,  
 A l'è prchè j' aneuja  
 Usè d' applicassion;

E pr scapè fatiga,  
 A treuvo dlong 'l mes,  
 Ciuciand da riga an riga  
 A coui ch'j' stan d' apres.  
 S' a veulo nen butesse  
 Studiè le soe lession,  
 Fan tuti ij sfors pr fesse  
 Amis dij decurion,  
 A san tan bin sulieje  
 Con mila compiment,  
 E bin sovens sborgneje  
 Ancor con quaich present.  
 Quand 'l magister s' treuva,  
 A n' ausso pa la vos,  
 I lo vedri pr preuva  
 Ch' a tiro tuit del dos;  
 S' a ven virè le spale,  
 Lasseje fè 'l balat,  
 A sauto com' d' cocale,  
 Ch' a par ch' ai sia 'l folat.  
 Quaich festa pr dmoresse  
 A fan i negligent,  
 Pr nen ancomodesse  
 A fè 'l componiment;  
 Peui diso d' ordinari,  
 Ch' a l' an avù quaich mal,  
 O ch' j' an pià 'l scartari,  
 O piuma, o caramal.  
 Quand pr quaich insolensa  
 Ch' a l' abio d' vote fait,  
 A s' treuvo la consiensa  
 Ambrlifà marlait,  
 Anlora a scapo a scola,  
 Vedend d' aveje tort,  
 O pur con la soa tola  
 A nego ferm e fort.

Ma quand pr gargaria

A van a scola tard,  
 Ai manca pa d' babia  
 Pr nen riceve d' lard;  
 A treuvo mila scuse,  
 Ch' a l' an avù da fè,  
 E con cinquanta ruse  
 A san gavesse i pè.

Quaich vota li ant la scola

A fan i seu scondion,  
 O d' una marendola,  
 O d' una colassion;  
 A san fè le soe fèrte  
 Con coui ch' ai stan a fianc,  
 Disend le soe barslète  
 Segrete sot al banc.

S' a son ficà an dosenna,

Anlora sti babiôt  
 Son aut un fus a penna,  
 Ch' a fan già i seu complot  
 Pr durvi la cherdensa,  
 O procurè d' ciapè  
 Sot man ant la dispensa  
 Quaicosa a galupè.

Ma pr nen impegneme

A descurvije ij stras,  
 I veui nen inoltreme  
 D' andè sgatè pi bas;  
 Prchè ch' ai na saria  
 Da di pr tut doman,  
 E i cherdo ch' i finiria  
 Fors gnanch passà doman.